

四庫全書

子部

欽定四庫全書

太平御覽卷一百九十二

宋 李昉等 撰

居處部二十

城上

城上

說文曰城以盛民也墉城垣也釋名曰城盛也盛受國都也  
又曰城上垣謂之睥睨言於孔中睥睨非常也亦曰睥

言裨助城之高也亦曰女牆言卑小比之於城若女子之於丈夫也所謂堞亦女牆也

易曰城復于隍

詩曰宗子維城無裨城壞

又曰挑兮達兮在城闕兮

又曰子子干旌在浚之城衛文公徙居楚邱始建城市而城市宮室得其時制焉

又曰崇墉言言

又曰哲夫成城哲婦傾城

又曰靜女其姝俟我於城隅

又曰赴赴武夫公侯干城

禮記曰登城不指城上不呼

左傳曰鄭莊公立姜氏愛共叔段為請京使居之謂之京城太叔祭仲曰都城過百雉國之害也

又曰美城之大名也

又曰楚囊瓦城郢沈尹戌曰苟不能衛城無益也

又曰梁伯好土功亟城而不處民罷而不堪則曰某寇將至乃溝公宮秦將襲我民懼而潰

又曰備豫不虞善之大者也莒恃其陋而不修城郭浹辰之間而楚克其三都

又曰無戎而城讐必保焉

又曰楚子圍鄭守陴者皆哭楚子退師鄭人修城進復圍之三月克之

又曰叔向告晉侯曰城上有烏齊師其道

又曰君其修德而固宗子何城如之

又曰士彌牟城成周計丈尺揣高卑度厚薄仞溝洫物  
土方議遠邇量事期計徒庸慮材用書糗糧令役於諸  
侯

又曰宋城華元為植

也

也城者謳曰睥其目瞞其腹弃

甲而復于思于思弃甲復來使其駭乘謂之曰牛則有  
皮犀兕尚多弃甲則那役人曰縱其有皮丹漆若何華  
元去之曰夫其口衆我寡

穀梁傳襄公曰大國過小邑必飭城禮罪禮也

明已國無罪

公羊傳曰城雉者何五板而堵五堵而雉百雉而城

公羊傳注曰天子之城千雉高七雉公侯百雉高五雉

男五雉高三雉

史記曰秦始皇使蒙恬北築長城西屬流沙東至遼水以捍胡

又曰秦二世欲漆其城優旃曰佳哉漆城蕩蕩寇來不能上易為漆耳顧難為蔭室二世笑遂止

漢書曰武帝太初元年使將軍公孫敖築塞外受降城  
又曰梁孝王廣睢陽城周圍七十里

又曰貳師遣屬國胡騎二千與虜戰兵壞散死傷者數  
百人漢軍乘勝追北至范大夫城

漢將姓范初築此城  
范亡其妻率衆完保

之因以  
為名

又曰車師前治交河城外分流繞城下故號交河去長  
安八千一百五十里

又曰昭帝元鳳六年募郡國徙遼東玄菟城



續漢書曰耿恭字伯宗為戊巳校尉屯後王部金蒲城  
謁者闕寵為戊巳校尉屯前王部柳中城

魏志曰曹公攻馬超渡渭每為超騎所衝突營不得立  
地又多沙不可築城婁子伯說公今天寒可以沙為城  
以水灌之一夜可立從之乃多作縑囊以盛土堰水夜  
渡兵作城比明城立公軍於是盡得渡

干寶晉記曰魏文帝之在廣陵吳人大駭乃臨江為疑  
城自石頭城至于江乘以木為枝衣以葦席加彩飾焉

一夕而成

晉書曰涼州城有龍形故名卧龍城本匈奴所築也

又曰朱序遷涼州刺史鎮襄陽符堅遣軍圍序序母韓氏自行城謂西北角當先弊遂領百餘婢及城中女丁築二十餘丈賊攻新築不敗遂引退襄陽謂之夫人城晉載記曰赫連勃勃以叱于呵利領將作大匠乃蒸土築城以錐刺之錐入一寸即殺作者不入即殺行錐者勃勃以為忠

沈約宋書曰檀道濟見收脫幘投地曰乃壞汝萬里長城

又曰氏師楊難當寇漢中魏興太守薛健保黃金城

崔鴻十六國春秋北燕錄曰初燕帝光始中丁零氏楊道獵於白鹿山為契丹所獲流漂塞外至大難北及黎大國逐水草而射獵為業至十月乃收葦以水澆令凍高一丈五尺東北七十八里南北二十餘里名陵城居於其中

又夏錄曰赫連勃勃下書曰古人制起城邑或因山水或以義立名今城都已建萬堵斯作克城弗遠宜有美名朕方統一天下君臨萬國可以統萬為名

燕書曰太祖皝光始八年下令唐柱等築龍城立門闕宮殿廟園籍田後遂改為龍城縣

北齊書曰唐邕字道和為給事黃門中書舍人文宣出塞邕必陪從文宣嘗登并州童子佛寺望并州曰此何等城也或曰金城湯池天府之國也文宣曰我謂唐邕

是金城此非也

唐書曰景雲二年三月張仁愿於河北築三受降城先是朔方與突厥以河下為界北有拂雲祠突厥每入寇必禱祠候冰合而入時默啜西擊仁愿奪取漠南城首尾相應以拂雲祠為中城東西相去各四百里背據津濟遙相應接北拓三百餘里於牛頭胡那山北置烽堠百八十自是突厥不得度山放牧朔方更無寇掠減鎮兵數萬人

又曰天寶二年正月二十八日築神都羅城號曰金城  
又曰天寶六載十二月築會昌縣城又置百司及諸公  
卿邸第

又曰建中元年五月築奉天城四年十月上避難于奉  
天初術士桑道茂奏請城奉天為王者之居至是方驗  
又曰貞元九年二月詔復築鹽州先是貞元三年城為  
吐蕃所壞自後塞外無保障犬戎入寇既城之後邊患  
頓息

五經異義曰天子之城高九仞公侯七仞伯五仞子男三仞

白虎通曰天子曰崇城言崇高也諸侯曰干城言不敢自專禦於天子也

周處曰周公作城于土中城方千六百二十丈郭方七十二里南繫洛水北因陝山為天下之大制也

家語曰邑百雉之城古之制也

國語曰衆心成城言以衆心為城

琴操杞梁死妻援琴歌曰樂莫樂兮新相知悲莫悲兮  
生別離哀感皇天城為隳

列女傳曰齊人杞梁襲莒戰而死其妻就夫之死城下  
哭之七日而城崩

淮南子崑崙山有層城九重

又曰鯀作九仞之城

墨子曰解為城西門守城之法積樵營雜茅葦有荻有  
木有積沙有蓬艾有麻腊有金錢有積粟



莊子曰孔子說盜跖曰使為將軍造大城數百里跖曰城之大者莫大乎天下也

韓子靖郭君城薛客諫靖郭君曰君失齊國雖薛城至於天猶無益也靖郭君乃不城薛

博物志曰處士東里塊責禹亂天下禹退作三城強者攻弱者守敵者死戰城郭禹始也

又曰代城始築立版幹一日亡西南五十里於澤中自立結葦為門因就營築焉其城圓周三十七里為九門

故城處呼曰東城

崔豹古今注曰秦所築長城土色紫漢塞亦然故稱紫塞

韓詩外傳曰趙簡子薨未葬中牟叛之既葬五日襄子興兵而攻之圍未匝而城自壞襄子擊金而退軍吏曰誅中年之罪而城自壞天助也何為退襄子曰吾聞君子不乘人於利不阨人於險使其城成然後攻之

述異志曰廬山上北嶺有城號康王城天雨聞鼓角之

聲傳云周康王好音累巡名山故有康王之號

又曰潯陽柴桑縣城晉永和有童謠呼為平石城時  
人僉謂平滅石之徵也桓玄篡位晉帝為平固王恭帝  
為石陽公俱遷於此城

又曰潯陽張允家在本郡郡南有古城張少貧約屢往  
遊憩忽有一老父來與張言因問之此城何名答曰吾  
不知為南郡城耳言訖便去不知所之張既出官仕進  
累遷位登元凱後為南郡太守即以城號以志老父之

言焉

又曰安陽有金城城皆如金色堅勁不崩摧先儒云上古時天雨黃金也

酈元水經注曰魯陽開水厯衡山西南經皇后城建武元年光武遣侍中傅俊持節迎光烈皇后於齊陽後發兵三百餘人宿衛皇后道路歸京師蓋稅舍所過得其名矣

又曰漢水東合甲水南流經金井城

又曰漢水東經方石城在高原上高十餘丈四面臨平形若覆盆

又曰易水西出寬中谷東經五大夫城昔北平侯王潭不同王莽之亂生五子並避亂隱居此山故其後居之世以為五大夫城

河北記云易縣有五公城王潭不從王莽潭子興生五子避隱於此世祖並封為侯元才北平侯顯才蒲平侯益才安

季才唐侯秀才中山侯號五侯其西三十里有五大夫城說

與此同

說苑曰中行穆子圍鼓人有以城叛來降者穆子不許  
軍吏曰師徒不勤得城何故不受穆子曰有以吾城叛  
者吾所惡也人以城來獨何賞

秦州記曰天水郡治上邽城前有湖水冬夏中停無增  
減天水取名由此湖也

又曰金城郡漢昭元始六年所置應劭云初築城得金  
故曰金城凡城皆稱金言其固也故墨子稱金城湯池

齊地記曰即墨城東西百八十里平昌城高六丈有臺有井與荆水通失物於井得之於荆水又神龍出入焉故一名龍城

三齊記略曰陽庭城東西二百五十里青城山秦始皇登此山造石城入河三十里臨海射魚方四百里水變血色今猶爾也解道虎齊記曰不夜城在陽庭東南一百二十里淳于髡稱海童作妖城古有日夜出見於東境故萊子城此以不夜為名

夢書曰城為人君一縣尊也夢見城者見人君也夢築  
新城有功名

新序曰梁伯酒於酒淫於色心愒而耳塞志好為城而  
不居民罷甚

武當山記曰魏興錫縣有長利城父老相傳云是長安  
土所築也

王韶之始興記曰有任將軍城秦南海尉任囂城也合  
逕有三城馬鞍城白鹿城晉咸康中張魴甚有惠政白



鹿羣游取一而獻之故因此為名

袁山松宜都記曰佷山縣有山名下魚城四面絕崖兩道可上皆險山周迴可二十里上有林木池水里許昔永嘉亂土人登此避賊賊守之經年食魚擲下與賊以示不窮賊遂退散因此為下魚城

吳地記曰閭門外越城者越來伐吳王在姑蘇築此城以逼之又有越來溪

又曰越來溪西魚城者吳王既遊姑蘇築此城以養魚

又曰魚城之西有故城長老云築以釀酒今俗人呼之  
為酒城

又曰婁門外鴨城者吳王築此城以養鴨

又曰匠門外雞陂者吳王養雞城

又曰海渚有吳王闔閭與越結怨相伐築城名曰南城  
以禦越

盛弘之荊州記曰牧馬城東三里有蜂城故老相傳云飢  
年民結侶拾蜂止憇其中故因為名又云城隨門勢上

大下尖其形似蜂故有蜂號二稱莫知所附故並載焉  
又云當陽縣東南有麥城又東有驢磨城犄角城傳云  
伍員造此二城以攻麥城故假驢磨之名

又曰樊城西北有鄆城即春秋所稱鄆子之國光武云  
宛最強鄆次之即謂此鄆城西北行十餘里是為鄆侯  
之國為楚文王所滅今為鄧城西又十餘里有穀城伯  
綏之門國城門有石人焉刊其腹云摩韃慎莫言疑此  
亦周太廟金人緘口銘背之流也

又曰秭歸縣西楊城周迴十餘里即熊繹所居

荊州圖記曰江夏郡所治夏口城其西南角因磯為高  
崇墉枕流上則遠眺山川下則激浪崎嶇是曰鵠磯實  
舟人之所艱也

又曰白帝城西臨大江東南高二百丈西北高一千丈  
又曰鄧城有樊城是樊仲山甫所封也

又曰沌陽縣有却月城西一里有馬城

又曰夷陽縣南對岸有陸抗故城即山為墉西面天險

上有步闌故城

又曰新野郡魏三公城左右傳漢時三公餞行處也

伏滔北征記曰梁國名故宋國微子所封城再重大城梁

孝王所築

孟粵北征記曰許昌在洛水之西方圓二十里有三重城南北東西土門金城西南負實中臺高六丈餘方圓二畝上有廟城門有鐵鑊

關中記曰長安地皆黑壤今赤如火堅如石父老所傳

鑿龍首山土為城又諸臺闕亦爾

益州記曰益州城張儀所築錦城在州南蜀故宮也其處號錦里

成都記曰府城本呼為錦城秦滅蜀張儀所築也每面三里周迴十二里高七丈屢皆傾側忽有大龜周行其所躡而築之成果就焉故亦號龜城

三輔黃圖曰長安城西南頭第二門名直城王莽改曰端路今名直城

太平御覽卷一百九十二

欽定四庫全書

太平御覽卷一百九十三

宋 李昉等 撰

居處部二十一

城下

郭壕  
槽附

城下

郭壕  
槽附

丹陽記曰石頭城吳時悉土塢義熙始加埽石因山為城  
因江為池諸葛亮曰鍾山龍盤石城虎踞良有之矣



又曰趙城去宮八里案越絕書則東甌越王所立也

又曰江寧縣北三十里有白馬城吳時為烽火之所

太康地記曰梁孝王築睢陽城十二里以鼓唱節杵而  
下和稱睢陽因以為縣

又曰鴈門馬邑縣秦時建此城輒崩不成有馬周旋馳

走反覆父老異之因以築城遂名馬邑云

搜神記  
亦載也

述征記曰思子城漢武帝延和二年衛太子遇江克之  
亂奔湖自縊壺闕三老太廟令田千秋訴太子之寃築

思子宮於湖其城存焉

續述征記曰廣固城右有大澗甚廣阻之為固謂之廣固

又曰白馬城魏黃初中曹彪封白馬王治于此城

又曰小陽城在陽城西南半里許俗謂曰堯城

羊頭山記邯鄲城邯山名邯蓋也邯山至此而盡也

又曰曲阜城城內有曲阜焉逶迤長八九里

東方朔十洲記曰崑崙之山積金為天城四面千里

關中記曰長安城其形似北斗其土本皆黑壤今城亦

如火堅如金父老所傳鑿龍首山以為城也

幽明錄曰始興縣有皐天子國因山崎嶇十有餘里坑塹數重阡陌交通城內堂塞碎瓦穿柱猶存東有皐天子冢皐天子未之聞也

劉直京口記曰有小昇城

鄧德明南康記曰歸羨山下有石城高數丈有一門門外有二石夾左右高數百尺遠望嵯峨雲闕騰空故老謂之神仙游焉

郡國志曰兗州兩觀城即仲尼為魯司寇誅少正卯之處

又曰陝州魏城即芮伯萬母惡芮伯逐之出居于魏處也後晉獻公滅之以賜畢萬山河之間土地迫隘故魏國著十畝之詩

又曰雲中府快馬城有綾羅泉即塞上翁所居之邑有快馬亭塞上翁六國前人姓李也

又曰雍州霸陵城在通化門東二十里秦襄王葬于其

坂謂之霸上

又曰汴之高陵城即高陽之墟也繁陽城漢云外黃縣有繁陽亭張氏為外黃令有夏后祠神并能興雨雹也又曰徐州薛城高厚無比多出暴桀子弟蓋孟嘗君餘風也

又曰六壁府後魏太平真君五年討胡於六壁即此城俗以城為六面因以為名焉

又有號城魏城相傳云晉既滅虞虢遷其人於此築城

以居之

又曰幽州無終縣西平城即李廣射石虎之處

又曰復州竟陵城雲夢城城西大澤即古雲夢澤也却月城在河口魏將黃祖所守處

又曰媯州涿鹿城即黃帝擒蚩尤處黃帝泉今枯而不流即古之版泉也

又曰涼州昌松縣有鷺鳥城魏改為神鳥城張軌時有五色鳥集於其處築城

又曰衛州有狗城蓋紂養狗之處也

又曰洛州夫人城即趙武靈王夫人築也

又曰衛州有酒城

又曰涼州卧龍城又云鳥城亦名翅城

又曰登州文登縣有不夜城有尚書城有石橋即秦始皇造欲觀日處文登山始皇召文士而登此山

又曰齊有士鄉城鄭玄云齊有士鄉城越有君子城

又曰同州韓城即韓原也詩所謂韓侯受命是也此即

春秋時秦擒晉惠公處

又曰肅州福祿城因謝艾所築也

又曰廉州宋大始年陳伯紹平夷至合浦見三青牛圍之不獲即其處置城俗號青牛城

又曰箕子城石勒每破一州必簡別衣冠號為君子城洎平幽州擢荀綽裴憲等還襄國路經此後俗訛為箕子城

又曰平州孤竹城即孤竹國也漢靈帝時遼西守廉翻



夢人云吾孤竹君之子也今遼海漂吾棺明日見浮棺  
因葬之

又曰雲中府齊柳牙館城有道人城初築時有仙人游  
其地遂名城焉

又曰成都城秦惠王二十七年張儀築以象咸陽沃野  
千里號曰陸海有萬歲池即築城取土之處也

又曰定州博陵縣唐城堯為唐侯國於此

又曰陽翟縣舊屬汝州有雞鳴城

又曰隋州博望城即張騫封侯之國也

又曰許州雍城即黃帝臣雍父始作杵臼處

又曰朔州太平城後魏穆帝治也太極殿琉璃臺瓦及  
鷓尾悉以琉璃為之

又曰鄭州博浪城即張良為韓報仇擊秦王處

又曰雍州杜城在安僊門南七里春秋范宣子云在周  
為唐杜氏即是此也

又曰益陽城魯肅築也人云登之望見長沙城邑人馬

形色宛然相去三百里父老云長沙益陽一時相望又  
廣州萬人城即尉佗故城也

又曰張掖郡實融築千秋城萬歲城

又曰洛陽澗池縣有秦趙二城號為俱利城

又曰定州博陵縣樂羊城魏文侯使樂羊取中山造

又曰重泉城漢武為李夫人築

又曰藍田有青泥城亦曰柳城

又曰賀州蕪城池隍中頗出珠玉寶器即尉佗拒防之

所也

又曰曹州漆園城莊周為吏處

又曰曹州白鴈城即衛侯伐鄭至鳴鴈是此也

又曰洛州王城宮城西入苑故郊廓城也周武王伐殷遷九鼎此地也夏至之影尺有五寸謂之土中焉泉亭即春秋時泉臯伊洛之戎同伐京師

又曰坊州廓城即高奴城俗謂高樓城

又曰汴有浚城廓詩云子子干旌在浚之城即謂此也

又曰爰有寒泉在浚之下水冬夏常冷因曰寒泉

又曰滑泉鹿鳴城城內有鹿鳴臺

又曰陳官城周二十里東晉所築號曰六門城宣陽門  
損上作虎刻木相對又施雲楣藻井又言武門上作重  
樓號曰西辰觀吳初築在府宮南號太初宮正殿曰神  
龍殿又有臨海赤烏殿孫皓起顯明宮引水激之飾以  
珠玉有彎崎臨矧之觀門及樓皆擊鼓持夜齊以鼓多  
驚眠改為鐵磬

過秦論曰秦踐革以為城因河以為池

越絕書曰石城者吳王闔閭所置美人離城也

又曰樓門外馬寧溪止復城者故越王無余君所治也

又曰樓門外鴻城者故越王城也去縣百五十里吳雞

籠山外陂故吳王所畜雞使李保養之去縣二十里闔

閭姑蘇臺外有九曲路闔閭造以遊姑蘇之臺去縣三

十里

又曰吳大城周四十七里二百十步陸門二有樓水門

八南十四里四十二步西面七里一百十二步北面八里二百六十步東面一十里七十九步闔閭所造也吳郭周六十八里六步吳小城周一十二里其下廣二丈七尺高四丈門三皆有樓東宮周一里二百步路西宮長秋門周一里二百二十六步秦始皇帝二十一年守營者昭鷲失火燒之

吳越春秋曰繇築城以衛君造郭以居人此城郭之始也

又曰范蠡視天文法於紫宮築作小城周千一百二十  
三步一圓三方西北立飛翼之樓以象天門東南服蒲  
石竇以象地名陵門四達以象八風外郭築城而缺西  
北示服事吳也不敢壅塞內以取吳故缺西北而吳不  
知也

又曰伍子胥乃使相土嘗水象天法地造築天城周迴  
四十七里陸門八以象天之八風水門八以象地之八  
牕築小城一十里陸門三東面者欲以絕越明矣立闔



門者以象天門通閭闔風立地門者以象地戶也闔閭  
欲西破強楚楚在西北故立閭門以通天氣也因復名  
破楚門

水經注曰葉東界有故城犍縣東至觀水逕沘陽縣界  
南北蟬聯數百里號為方城一謂之長城云酈縣有故  
城一面未詳里數號為長城即此城之西隅其間相去  
六百里北面雖無基築皆連山相接而漢水流其南故  
屈完答齊桓公云楚方城以為城漢水以為池

郡國志曰葉縣有長城曰方城指此城也

吳地記曰袁山松城晉書曰左將軍袁山松陳郡人時  
為吳郡太守隆安五年築此城在滄瀆邊以禦孫恩者  
孫恩圍山松於此城陷害山松城今為浪潮所衝已半  
毀江中山松城東夾江又有二城相對闔閭所築以備  
越處

鄱陽記曰僊人城在縣東南其城皆峭壁危石直立千  
仞自古呼為僊人城每天空無雲秋日清澈其上宮殿

倉廩歷歷可見

趙曄吳越春秋曰堯聽四嶽之言用鯀修水鯀曰帝之  
遭天災厥黎及康乃築城造郭以為國固

淮南子曰崑崙山上有層城九重

列女傳曰齊人杞梁襲莒戰而死其妻無所歸乃就  
夫尸於城下而哭之七日城崩妻遂投淄水而死

郭

說文曰郭廓也廓落在城也

禮記月令曰孟秋之月修宮室補城郭

又禮記曰正月無置城郭

妨農也

國語曰火見清風戒寒清風至而修城郭宮室

月令曰孟冬坏城郭

漢書曰馬援所過為郡縣治城郭

謝承後漢書曰汝南廖扶畢志衡門死葬北郭號曰北

郭先生

風俗通曰郭郭也亦大也

莊子曰孔子謂顏回曰回來家貧居卑胡不仕乎顏回對曰不願仕回有郭外之田五十畝足以給饘粥郭內之田十畝足以為桑麻鼓琴足以自娛學夫子之道足以自樂回故不仕矣

魏畧曰秦國石為城郭

管子曰內謂之城外謂之郭

焦貢易林曰金城鐵郭上下同力寇不敢賊

王肅表曰夫城之有郭猶裏之有表骨之有皮表裏各

異則保障不完皮骨分離則一體不具

壕

釋名曰城下謂之壕壕翺也言都邑內所翺翺也祖駕處也

禮記曰今大道既隱天下為家各親其親各子其子貨力為已城郭溝池以為固謀用是作兵由是起

漢書神農之教曰有石城十仞湯池百步帶甲百萬而無粟不能守

櫓

釋名曰櫓露也露上無覆屋也

孫子兵法曰攻城之法修櫓枌楹其器械三月而後成  
陸機洛陽記曰洛陽城周公所制東西十里南北十三  
里城上百步有一樓櫓外有溝渠

太平御覽卷一百九十三

欽定四庫全書

太平御覽卷一百九十四

宋 李昉等 撰

居處部二十二

館驛

傳舍

亭

館驛

說文曰館客舍也從食官聲



周禮曰五十里有市市有館館有積以待朝聘之客

廣雅釋宮云館舍也桂苑云客舍也待賓之舍曰館開  
元文字云凡事之賓客館馬舍也館有積以待朝聘之  
官是也客舍逆旅名候館也公館者公宮與公所為也  
私館者自卿大夫以下之家

禮記曰舊館人之喪脫驂而賻

左傳曰敢辱大館

又左傳曰楚令尹子元欲盪文夫人為館於其側而振

萬馬萬

儼

又左傳曰改館晉侯饋七牢焉

詩國風鄭緇衣曰適子之館兮還予授子之筴兮

又大雅公劉于豳斯館

周禮地官司徒下云國野之道十里有廬廬有飲食三十里有宿宿有路室路室有委五十里有市市有候館候館有積注云候館樓館可以觀望也

又曰秋官司寇下云凡諸侯入王則逆勞于畿及郊勞

視館注視館致館也

又司儀云主君郊勞交擯三辭車送拜三揖受拜車送三辭再拜致館亦如之注云館舍也使大夫授之君又以禮親致之儀禮聘禮云卿致館注云致至也至此館主人以禮致之所以安之也

又環人云掌送迎邦國之通賓客以路節達諸四方舍則授館又云至于國賓入館次于舍門注次待事于客儀禮公食大夫禮云有司卷三牲之俎歸于賓館注云

牲之俎正饌尤尊蓋以歸尊賓之至也

又聘禮云厥明訝迎于館注云此訝下大夫以君命迎賓謂之訝迎亦皮弁也

禮記曲禮上云問疾弗能遺不問其所欲見人弗能館不問其所舍

又檀弓上云賓客至無所館夫子曰生於我乎館死於我乎殯

又曰子貢曰於門人之喪未有所脫駢脫駢於舊館無

乃已重乎

又曾子問云卿大夫之家曰私館與公所為曰公館注云公館若今縣之官舍也

左傳莊元年經曰夏單伯送王姬秋築王姬之館于外注云公在諒闇慮齊侯當親迎不忍便以禮接於廟又不敢逆王命故改築舍於外也

又僖三十年傳云晉分曹衛之田公使臧文仲往宿於重館重館人曰晉新得諸侯必親其恭不速行將無及

也

又襄三十一年傳云子產相鄭伯如晉晉侯以我喪故未之見也子產使壞其館之垣而納車馬士文伯讓之曰敝邑以政刑之不修寇盜充斥是以令吏人完容所館今吾子壞之其若異容何子產曰僑聞之文公之為盟主也宮室無觀臺榭以崇大諸侯之館今銅鞮之宮數里而諸侯舍於隸人門不容車不可踰越士文伯不能對晉侯見鄭伯有加禮厚其宴好而歸之乃築諸侯

之館

又昭十三年傳云宣子謂叔向曰子能歸季孫乎對曰不能鮒也能乃使叔魚見季孫曰鮒聞諸吏將為子除館於西河其若之何且泣

又曰叔孫所館雖一日必葺其牆屋去之如始至

漢書薛宣子惠為彭城令宣過之橋梁郵驛不修宣知其不能

又郊祀志曰孫卿曰僂人可見上往常遽以故不能見

今陛下可為館如緹氏城置脯棗神人可致且僊人好樓居於是上令長安作飛廉柱館甘泉作延壽館

又曰鄭莊置驛以延賓客

又曰公孫弘起徒步數年至宰相封侯於是起客館開東閣以延賢人與叅謀議

又元后傳曰王莽又知太后婦人厭居深宮中莽欲娛樂以示其權迺令太后四時車駕巡狩四郊存見孤寡婦人春幸繭館率皇后列侯夫人桑遵灞水而被除



又外戚傳曰成帝許美人在上林涿沐館數召入飾室  
中元延二年懷子

漢書叙傳曰述元紀云宮不新館陵不崇墓又揚雄傳  
長楊賦云張網置罟捕熊豪猪抗獾狐兔麋鹿載以檻  
車輪長楊射熊館又羽獵賦云於是禽彈中衰相與集  
於靖宜之館

魏志曰文昭甄宣后明帝母也后已早廢父逸上蔡令  
早卒及明帝即位追封逸為上蔡侯謚敬侯適孫蒙襲

爵蒙子暢嗣上為暢起大第車駕臨之故世說曰魏明  
帝為外祖母築館于甄氏自行視謂左右曰館當以何  
為名侍中繆襲對曰陛下聖恩齊于哲王罔極過于曾  
閔此館之興情鍾舅氏宜以渭陽為名

魏書曰帝於後園為母起觀及宮名其里曰渭陽里

晉書天文志云傳舍九星在莖善上近河賓客之館主  
胡人入中國客星守之備奸使亦曰胡兵起

宋書文帝本紀云帝臨玄武館閱武

又隱逸雷次宗傳云徵詣京邑為築室於鍾山西巖下  
謂之招隱館

齊書褚伯玉傳云高帝即位手詔吳會二郡以禮迎伯  
玉伯玉辭疾上不欲違其志勅於剡白石山立太平館  
以居之

梁書高祖紀云大統七年幸於宮城西立士林館延集  
學徒置集雅館以招遠學

冲虛真經黃帝云黃帝於是放萬機舍寢去直侍徹鍾

縣減厨膳退而閒居大庭之館齋心服形三月不親政  
事

漢武帝故事云上自封禪後夢高祖坐明堂羣臣亦夢  
想於是祀高祖於明堂以配天還作高陵館

郡國志台州僊石山有館土人謂之黃公客堂堂兩邊  
有石步廊觸石雲崇朝必有雨有四竿筋竹風吹自成  
音拂石皆淨即王方平遊處

荊州圖記云襄陽縣南水行四十里陸道六十里有桃

林館

建康地記云顯仁館在江寧縣東南五里青溪中橋東  
湘宮巷下古高麗使處

西京雜記云公孫弘自以布衣為宰相乃開東閣營客  
館以招天下之士其外曰欽賢館以待大賢翹材館以  
待中材接士館以待國士

又曰梁孝王遊於忘憂之館進諸遊士各使為賦隱設  
易遷館合貞臺有女貞二人為主一曰張微子二曰傅

禮和

晉宮閣名云華林園有繁昌館建康館顯昌館延祚館  
壽安館千祿館

班孟堅西都賦云於是天子乃登屬玉之館歷長楊之榭  
張平子西京賦曰顧往昔之遺館獲林光於秦餘

又云郡國宮館百四十五石極蓋屋并卷鄴鄴

又云豫章珍館揭焉中峙

班婕妤自傷賦曰痛陽祿與柘館  
皆宮名生二子處此二館皆失也  
乃

祿襁而罹災豈妾人之殃咎兮將天命之不可求也

張衡西京賦曰既新作於迎風增雨露與儲胥託高基

於山岡直帶霓以高居

薛綜注曰皆係館名

張衡東京賦曰其西則有平樂都場示遠之館龍省盤

蛇天馬半漢

劉劭趙都賦曰置酒乎黃華之館

左思魏都賦曰營密館以周坊飭賓侶之所業

潘尼東都館賦曰東館者蓋東都侯之館也俄而遷居

謂余曰吾將老焉故有終焉之心而無移易之意予且  
為我賦之

傳舍

釋名曰傳傳也人所止息而去後人復來轉相傳無常  
人也

史記曰藺相如為趙王奉璧使秦秦王舍之廣成傳舍索隱

曰廣成是

傳舍之名

傳載曰鄭審開元中為殿中侍御史充館驛使令每傳



舍立十二辰候自審始也

亭

釋名曰亭亭也人所停集也

風俗通曰謹案春秋國語有寓望謂今亭也民所安定也亭有樓從高省丁聲也漢家因秦大率十里一亭亭留也今語有亭留亭待蓋行旅宿食之所館也亭亦平也民有訟爭更留辨處勿失其正也

漢書項羽傳曰烏江亭長艤船待羽

又曰武帝元封元年幸緱氏登太室上聞萬歲聲者三  
故立萬歲亭

又韓信傳曰信從下鄉南昌亭長食

張晏曰下鄉屬淮陰

亭長妻

苦之乃晨炊蓐食

又曰李廣嘗從一騎至霸陵尉醉呵止廣宿亭下

高允塞上公亭詩序曰延和三年余赴京師發石門北  
行失道路寓宿代之快馬亭其俗云古塞上翁所遺之  
邑也公有良馬因以命之此其所遺也負長城而面南

山臯潭帶其側湧波灌其前停駢策以流目抱遺風以依然仰德音於在昔遂揮毫以寄言代人云塞上公姓李代之李氏並其後也

潘岳傷弱子曰惟元康二年春三月壬寅弱子生夏五月余之長安壬寅舍于新安之千秋亭甲辰而弱子失越翌旦乙巳瘞于亭

續漢書曰靈帝到下門亭使竇武持節以玉青蓋迎入殿中

又曰蔡邕避難在吳告人曰吾昔至會稽高遷亭見竹  
椽從東間數第十六可以為籥取用果有異聲

東觀漢記曰王郎起光武自薊東南馳晨夜至饒陽燕  
萋亭時天寒衆皆飢馮異上豆粥

又曰趙孝父為田禾將軍孝嘗從長安來欲止亭亭長  
難之言有貴客過掃灑不欲穢汙地良久乃聽止吏因  
問曰田禾將軍子長安來何時發幾日至孝曰尋到矣  
張璠漢記曰楚曄為天水太守之官與故太守喪會于

隴亭堂吏移喪避暉暉讓于正堂關西稱之

謝承後漢書曰蒼梧廣信女子蘇娥行宿鵲巢亭為亭

長龔壽所殺及婢致富取財物理置樓下交趾刺史周

敞行部宿亭覺壽奸罪奏之殺壽

列異傳云  
鵲奔亭

漢書典職曰洛陽二十四街街一亭十二城門門一亭

魏畧曰從長安至大秦人民連屬十里一亭

魏書曰元皇后以漢延嘉三年二月生齊郡白亭有黃

氣滿室移日不散

吳志曰孫權將如吳親乘馬射虎凌亭馬為虎所傷權投以雙戟虎即廢

又曰太史慈劉繇住涇縣立屯府大為山越所附孫策躬自攻討遂見囚執策即解縛捉其手曰寧識神亭戰時耶卿爾時得我云何慈曰未可量也策大笑

王隱晉書曰徐苗字叔胄高密淳于人也事曾祖至行感靈夜有神人告亭欲崩苗出亭崩得免

又曰王羲之初度江會稽有佳山水名士多居之與孫

綽許詢謝尚支遁等宴集於山陰之蘭亭

崔鴻十六國春秋曰慕容垂請入鄴城拜廟苻登不許  
乃潛服而入亭吏禁之垂怒斬吏燒亭而去

沈約宋書曰孔窳子與王華並有富貴之願自徐羨之  
等秉權日夜構之於太祖曰窳子常東歸至金昌亭左  
右欲泊船窳子命去之曰此弒君亭不可泊也

又曰徐湛之為廣陵郡守善為政威惠並行廣陵城舊  
有高樓湛之更加修整更起風亭月觀吹臺琴室果竹

繁茂成行

帝王世紀曰桀敗於鳴條之野案孟子舜卒鳴條乃在東夷之地或言陳留平丘今有鳴條亭在安邑之西

世說曰過江諸人每至暇日輒相要出新亭籍卉飲宴周顛在亭嘆曰風景不殊舉目有河山之異皆相視流淚惟丞相愀然變色曰當共戮力王室克復神州何至作楚囚相對泣耶

夢書曰亭為積功民所成也亭築亭者功積成也亭亭



壞敗恩澤傷也

韋耀雲陽賦曰八鄉九市亭侯三六列樹表塗路有廬宿

丹陽記曰京師三京新亭吳舊亭也故基淪廢丹陽尹司馬恢移創今地謝石創征虜亭三吳搢紳創治亭並太元中

丹陽記曰稽亭北瞰大江南望高嶽淹留遠客因以為名焉

劉楨京口記曰劫亭臨湖湖通江陵郡治丹徒縣八縣  
來往經過此湖中多劫於邊立亭因以為名

裴淵明廣州記曰尉佗築臺以朔望升拜號為朝拜臺  
傍江構起華館以送陸賈因稱朝亭

永嘉記曰樂城縣三京亭此亭是祖送行人之所

王韶之始興記曰淘水源有堯山長嶺衡亘遠望如陣  
雲山下有平陵陵上有古大堂基十餘處雖已夷漫而  
猶可識謂曰堯故亭父老相傳堯南巡登此山故亭即

其行宮

三齊畧記曰曲城齊城東有萬歲水水北有萬歲亭漢武帝所造

伏琛齊地記曰平壽城西北有平望亭

莊子曰仁義者先生之蘧廬也

注傳舍也

華延雋洛陽記曰城內都亭華林奉常廣世昌益廣莫定陽遮要暴室廣陽西明萬歲文陽東明視中東因建奉止奸得宮東陽千秋安衆孝敬清明二十四亭河陰

界東出戶鄉亭南泉亭街郵亭

孔躔會稽記云江夏太守宋輔於重山南白樓亭立學  
教授

又郡國志云沛國桓儼避地至會稽聞陳業賢而往候  
之不見臨去入交州留書繫白樓亭柱而別

鄱陽記曰白雲亭在縣西南旁對干越亭而峙焉跨石  
城之危瞰長江之深隨州刺史劉長卿題詩曰孤城上  
與白雲齊因以白雲為名

豫章記曰徐孺子墓在郡南十四里曰白社亭吳嘉禾  
中太守長沙徐熙於墓遂種松太守南陽謝景於墓側  
立碑永安中太守梁郡夏侯嵩於碑邊立思賢亭松碑  
亭今並在松大合抱亭世世修治至今謂之謝君亭  
越絕書曰女陽亭者勾踐入役於吳夫人從道產女於  
亭養於馮李謂之女兒鄉

郡國志皇甫謐云鳴條之野立鳴條亭

又曰涼州候馬亭貳師伐大宛得天馬感西風頓羈而

逸至燉煌北塞下鳴而去貳師候於此遂名之

又曰韶州潼溪里有三楓亭

又曰齊州周首亭即埋長狄喬如首於山西是也

又曰冀州華陽亭即嵇康夜學琴於此

又曰幽州督亢亭即荆軻以地圖獻秦處

又曰柳州武丁岡有樂亭即太守樂巴所建也

又曰柯亭一名千秋亭又名高遷亭會稽記云漢議郎

蔡邕避難宿於此亭仰觀椽竹知有奇響因取為笛果

有異聲

又曰潤州覆舟山有閶風亭

襄江記峴山亭在襄陽縣東一十里今基跡尚存

兩京新記曰西京苑內有望雲亭鞠場亭柳園亭真興亭神臯亭園桃亭臨渭亭永泰亭南昌園園北昌國亭流杯亭青門亭即召平種瓜之所也

又曰東京上陽宮有曜掌亭九州亭

又曰東都苑內有金谷亭凝碧池

建康記曰止馬亭在飛猿嶺口馬之登降於此止息故名之



太平御覽卷一百九十四

欽定四庫全書

太平御覽卷一百九十五

宋 李昉等 撰

居處部二十三

逆旅

道路

馳道

塗

阡陌

街

巷

逆旅

左傳僖公上曰荀息假道於虞曰今虢為不道保於逆旅以侵敝邑之南鄙

史記曰師尚父東就國道宿行遲逆旅之人曰吾聞時難得而易失客寢處安殆非就封者也太公聞之夜衣而行至國萊侯來伐與之爭營丘

漢武帝故事曰上嘗至栢谷夜投亭宿亭長不內乃宿於逆旅逆旅翁謂上曰汝長大多力當勤種稼穡何忽

帶劍羣聚夜行動衆此不欲為盜則淫耳上默然不應  
因乞漿飲翁曰吾止有溺無漿也有頃還內上使人覘  
之見翁方要少年十餘人皆持弓矢刀劍令主人媼出  
安過客媼歸謂其翁曰吾觀此丈夫乃非常人也且亦  
有備不可圖也不如因禮之其夫曰此易與耳鳴鼓會  
衆討此羣盜何憂不克媼曰安之令其眠乃可圖也翁  
從之時上從者十餘人既聞其謀皆懼勸上夜去上曰  
去必致禍不如且止以安之有頃媼出謂上曰諸公子

不聞主人翁言乎此翁好飲酒狂悖不足計也今日且令公子安眠無他嫗因還內時天寒嫗酌酒多與其夫諸少年皆醉嫗出謝客殺雞作食平明上去是日還宮乃召逆旅夫妻見之賜嫗金十觔其夫為羽林郎自是懲戒希復微行

續漢書五行傳曰靈帝數遊戲於西園中令後宮綵女為客舍主身為商賈服行至舍綵女下酒食因共飲食以為戲樂

東觀漢記曰第五倫自度仕宦牢落遂將家屬客河東  
變易姓名自稱王伯齊常與奴載鹽北至太原販賣每  
所至客舍去輒為糞除道上號曰道士開門請求不復  
責舍宿直

范曄後漢書曰周防字偉公父楊少孤微常修逆旅以  
供過客而不受其報

郭林宗別傳曰林宗每行宿逆旅輒躬灑掃及明去後  
人至見之曰此必郭有道昨宿處也

晉書曰桑虞常行寄逆旅同宿客失脯疑虞為盜虞默然無言便解衣償之主人曰此舍數失魚肉雞鴨多是狐狸偷去君何以疑人乃將脯主至山冢間尋求果得遺脯以衣還虞虞投之不顧

說苑曰鄭桓公會封於鄭暮舍於宋東之逆旅逆旅之叟從外來曰客將焉之曰會封於鄭逆旅之叟曰聞之時難得而易失也今客之寢安殆非就封者也鄭桓公聞之援轡自駕行十日十夜至即有與之爭封者

楚辭七諫曰路室女之方桑

路室客舍

孔子過之以自侍

言

子出遊過於客舍其女方採桑  
一心不視善其貞信故以自侍

潘岳客舍議曰被下尚書勅客舍廢農奸淫亡命敗亂  
法度皆當除外十里安一宮舍使老少貧民守之又差  
吏掌主依官舍收錢數春農事興求須冬閒謹案客舍  
逆旅久矣其所由來矣行者賴其頓止居者薄收其直  
交易貿遷各得其所官無役賦而因民成利惠加百姓  
而公無所費語曰許由辭此帝堯之命而舍於逆旅自



唐到今未有不得客舍之法

道路

爾雅曰廟中路謂之唐一達謂之道路二達謂之枝旁

三達謂之劇旁

今南陽冠章孫鄉數通  
交錯道路呼之五劇鄉

四達謂之衢五

達謂之康六達謂之莊七達謂之劇驂

三道復一道岐  
出者北海極縣

有此  
道也

八達謂之崇期

四道  
交出

九達謂之達

四者交征出  
復有旁通者

又曰大路謂之奔

說文曰一達謂之道路又曰馗九達道也似龜背故謂

之道

易曰艮為徑路王廙注曰物始故為徑路

又曰何天之衢道大行也

又曰憧憧往來朋從爾思

詩曰道之云遠曷云能來

又曰行道遲遲中心有違

又曰蹶蹶周道鞠為茂草

又曰道阻且躋

升也

又曰周道逶遲

歷遠貌

又曰周道如砥

均平也

又曰有扶之杜生於道周

又曰遵大路兮摻執子之祛兮

又曰肅肅兔置施于中逵

周禮夏官曰合方氏掌天下道路

又曰司險掌九州之圖以周知其山林川澤之阻而達

其道路

又夏官候人曰各掌其方之道

禮記檀弓曰哀公使人弔蕢尚遇諸道於路畫宮而受

弔焉

哀公魯君也畫宮畫地為宮象

曾子曰蕢尚不如杞梁之妻知禮

也

又月令曰三月開通道路

又曰道路男子由左婦人由右車從中央

左傳曰公孫闕與潁考叔爭車潁考叔挾軛以走子都拔戟以逐之及大逵弗及子都怒

又曰盟諸五父之衢

史記曰文帝行至灞陵慎夫人從上示慎夫人新豐道曰此走邯鄲道也

東觀漢記曰逢萌被徵道上迷不知東西云朝所徵我者為聰明睿智有益於政方面不知安能濟政即駕而歸

國語曰夫辰角見而除道故夏令曰九月除道

賈逵注曰辰角

大辰倉龍之宿角星名也

家語曰武王克商通道于九夷八蠻

魏晉春秋曰阮籍有時率意獨行不由徑路車路所窮輒慟哭而走

陸機洛陽記曰官門及城中大道皆分作三中央御道兩邊策土墻高四尺餘外分之唯公卿尚書章服道從中道凡人皆行左右左右出入夾道種榆槐樹此三道四通五達也

淮南子曰楊朱見岐路而哭曰可以南可以北

又曰聖人之道如衢設罇過者斯酌之

博物志曰文王以太公為灌壇令其年風不鳴條文王  
夢一婦人甚麗當道哭問其故曰我東山女嫁為西海  
婦行必以暴風雨今灌壇令當道有德吾不敢以風雨  
過也

十洲記曰天帝君之城仙員之人出道徑自有一路內  
到鍾山海阿門外天帝君摠九夫人之維貴無比焉

崔豹古今輿服注曰警蹕所以戒徒行蹕路也謂行者

警於途路

列子曰堯治天下未知天下治歟不治歟微服遊於康衢聞兒童謠曰立我烝民莫匪爾極

任豫益州記曰江油左擔道案圖在陰平縣北於成都

為西

其道至阻自北來者擔在左肩不得度擔也

鄧艾束馬懸車處

郡國志曰雍州軹道在道化門東北十里

又曰朱超石與兄書曰洛下道路本好青槐蔭映可愛列子曰楊子之憐亡羊既率其黨又請楊子之豎追之



楊子曰亡一羊何追者衆曰多岐路既反問獲羊乎曰  
亡之矣岐路之中又有岐焉吾不知所之而反楊子曰  
大道以多岐亡羊學者以多方喪志

韓子曰魯以五月起衆為長溝子路私為漿飲要作溝  
者於五甫之衢孔子譏其不知禮也

楚辭曰心不怡之長久憂之以相接惟郢路之遼遠兮  
江與夏之不可涉

古樂府詩曰相逢狹路間道隘不容車

古詩曰驅車駕言邁悠悠涉長道

### 馳道

史記賈山曰秦為馳道東窮燕齊南極吳楚道廣五十

步三丈而樹厚築其外隱以金椎

以鐵錐築之  
隱於靳反

樹以青

松十里一亭亭有長十亭一鄉鄉有三老有秩嗇夫游  
徼三老掌教化嗇夫職聽訟收賦稅游徼循盜賊秦  
制也

漢書曰江充出逢館陶長公主行馳道中充問之公主

曰有太后詔克曰獨公主得行車騎皆不得盡劾沒入官克從上甘泉逢太子家使乘車馬行馳道中克以屬吏太子聞知使人謝克曰非寡車馬誠不欲令上聞之以教勅亡素者唯江君寬之克不聽遂白奏上曰人臣當如是矣大見信用威震京師

又曰惠帝為東廟長樂宮作複道方築高帝廟南叔孫通曰陛下何築複道高帝寢衣冠日出遊高廟奈何令子孫宗廟道上行哉惠帝懼曰急壞之通曰人主無過

舉今已作百姓皆知矣願陛下為原廟渭北衣冠月游之益廣宗廟大孝本也帝從之

又曰元帝即位成帝為太子上嘗召太子出龍樓門不敢絕馳道至直城門得絕乃度上遲之問其故以狀對上乃令太子被召得絕馳道

又曰上居雒陽南宮從複道望見諸將往往數人偶語上曰此何語良曰陛下不知乎此謀反耳上曰天下安定此屬何故而反良曰陛下與此屬取天下今陛下已

為天子而所為封皆蕭曹故人所誅者皆平生讐怨今  
軍吏計功天下不足以徧封又恐見疑過失及誅故相  
聚謀反耳上廼憂曰今將柰何良曰上平生所憎羣臣  
所共知誰最甚上曰雍齒與我有故數窘辱我良曰今  
急先封雍齒以示羣臣則人人自堅矣於是置酒封雍  
齒為什邡侯而急趣丞相御史定功行封羣臣皆喜曰  
雍齒且侯我屬無患矣

塗

易震卦曰為大塗

王虞注曰大塗萬物所出

論語陽貨曰道聽而塗說德之弃也

爾雅曰堂塗謂之陳路依塗

呂氏春秋曰孔子用魯三年男行乎塗左女行乎塗右財物之遺者民莫之舉

司馬相如上林賦曰長塗中宿

阡陌

史記曰商鞅相秦孝公壞井田開阡陌

漢書游俠傳曰原涉廼大治冢舍周閣重門初武帝時京兆尹曹氏葬茂陵民謂其道為京兆阡涉慕之廼買地開道立署門曰南陽阡人不肯從謂之原氏阡

趙書曰佛圖澄建武末卒葬鄴西紫陌先造生墓已數年矣

三輔故事曰文王武王周公召公皆葬畢陌南北

風俗通曰南北曰阡東西曰陌

曹植詩曰東西經七陌南北越九阡

陸機詩曰迴渠繞曲陌通波扶直阡

街

說文曰街四通道也

漢書曰張敞無威儀罷朝會走馬章臺街

璣曰在長安建章臺下街

也

郡國志曰雍州司天臺西北有香室街

又曰夕陰街在右扶風南

東觀漢記曰建武時天下墾田皆不實詔下州郡檢覈



時州郡各遣使奏事帝見陳留吏牘上有書視之云潁川弘農可問河南南陽不可問帝詰使言於長壽街得之

漢官典職曰洛陽有二十四街街一亭

華氏洛陽記曰兩銅駝在宮之南街東西相對高九尺漢時所謂銅駝街是又曰洛陽街

三輔故事曰太上皇在長安香街南高廟在長安城門街東太常街南

漢宮殿疏曰長安有八街九市

風俗通曰京師有長壽街萬歲街士馬街若此非一街者雋也離也四出之路雋離而別

巷

毛詩曰子之丰兮俟我乎巷兮

巷門外也

又曰叔于田巷無居人叔于狩巷無飲酒叔適野巷無服馬

又曰姜嫄始生后稷誕寘之隘巷牛羊腓字之

論語孔子曰賢哉回也一簞食一瓢飲在陋巷人不堪其憂回也不改其樂

爾雅曰宮中謂之壺

漢書曰陳平家貧負郭窮巷以弊席為門門外多長者車轍

晉書曰紀瞻性靜默少交遊好讀書或手自抄寫凡所著述詩賦牋表數十篇兼解音樂殆甚妙厚自奉養立宅於烏衣巷館宇崇麗園池竹木有足賞翫焉

丹陽記曰七戰巷者庾亮與蘇峻戰宣陽門外峻初小  
退尋復來攻交戰者七亮乃南奔故有此名

南唐書曰窮巷多恠曲學多辨也

尸子曰舜之方陶不能利其巷也及南面而君天下蠻  
夷皆被其福

太平御覽卷一百九十五

欽定四庫全書

太平御覽卷一百九十六

宋 李昉等 撰

居處部二十四

苑囿

苑囿

風俗通曰苑蘊也薪蒸蘊積也言畜魚鱉處也囿猶有也  
說文曰苑有園曰囿一曰養禽獸曰囿

毛詩文王靈臺曰王在靈囿麋鹿攸伏

左傳僖上曰齊侯與蔡姬乘舟于囿蕩公公懼變色禁之不可公怒歸之未絕蔡人嫁之

又成下曰十八年秋築鹿囿書不時也

又曰冬築郎囿書不時也季孫欲速成叔孫昭子曰焉用速成其以勤民也無囿猶可無民其可乎

又曰鄭之有原圃猶秦之有具囿注皆囿名也

毛萇詩注曰囿所以養禽獸天子百里諸侯四十里

大戴禮曰正月祭韭園

周官曰囿人掌游囿之獸禁鄭玄注云游囿囿之離宮小苑遊觀處也禁者其蕃衛也囿游之獸游牧之獸也史記曰漢二年東畧地故秦苑囿園池皆令民田之

滑稽傳曰秦始皇欲大苑囿東至函谷關西至陳倉優旃曰善多縱禽獸於其中寇從東方來令獸觸之足矣始皇以故輟止

又蕭相國請曰上林中多空地願令民得田苑中上大



怒曰相國多受民財乃為民請吾苑乃下廷尉械繫數日王衛尉侍曰便於民而請真宰相事陛下距楚數歲陳豨黥布反上自擊之當是時相國守關中搖足則關已西非陛下有也相國不此時為利今乃利賈人之金乎陛下何疑於是使持節赦出何徒跣謝上曰休矣相國為民請吾苑吾不許我不過為桀紂主而相國為賢相耳

漢書曰武帝好微行往南山下乃知帝微行數出也然

尚迫於太后未敢遠出丞相御史知音乃使右輔都尉  
徽循長楊以東右內使發小民供待會所後乃私置更  
衣從宣曲以南十二所中休更衣

師古曰宣曲宮  
名在昆明池西

投宿

諸宮長楊五柞信楊宣曲尤幸於是上以為道遠勞苦  
又為百姓所患乃使太中大夫吾丘壽王待詔能月算

者二人舉籍阿城以南

阿城本秦  
阿房宮也

鑿屋以東宜春以西

隄封頃畝及其價直欲除以為上林苑屬之南山又詔  
中尉左右內史表屬縣草田欲以償鄠杜之民時東方

朔在傍進諫曰臣聞謙遜靜慤天表之應應之以福驕  
溢靡麗天表之應應之以異今陛下累廊臺恐其不高

也

師古曰廊者  
堂下周屋也

弋獵之處恐不廣也如今不為變則三

輔之地盡可以為苑何以償蓋屋鄠杜乎奢侈起制天為  
之變上林雖小臣尚以為大也夫南山天下之阻也南  
有江淮北有河渭其地從汧隴以東商雒以西厥壤肥  
饒漢興去三河之北止霸產以西都涇渭之南北所謂  
天下陸海之地秦之所以虜西戎兼山東者也其山出

玉石金銀銅鐵豫章檀栢異類之物不可勝原此百工所取給萬民所仰足也又有杭稻梨粟桑麻竹箭之饒土宜薑芋水多鰾魚貧者得以人給家足無飢寒之憂故鄴鎬之間號為土膏其賈畝一金今規以為苑絕陂池水澤之利而取民膏腴之地土乏國家之用下奪農桑之業棄成功就敗事損耗五穀是其不可一也且盛荆棘之林而長養麋鹿廣狐兔之苑大虎狼之虛又壞人家墓發人室廬令幼弱懷土而思耆老泣涕而悲是

其不可二也斥而營之垣而圃之騎馳東西車騫南北  
又有深溝大渠夫一日之樂不足以危無隄之輿是其  
不可三也故務範圍之大恤農時非所以彊國富人也  
夫殷作九市之宮而諸侯畔靈王起章華之臺而楚民  
散秦興阿房之殿而天下亂糞土愚臣忘生觸死逆盛  
意犯隆指罪當萬死不勝大願願陳泰階六符以觀天  
變不可不省是日因奏泰階之事上廼拜朔為太中大  
夫給事中賜黃金百斤然遂起上林苑如壽王所奏云

又曰武帝初建元三年微行始出北至池陽西至黃山  
南獵長楊東游宜春微行常用飲酎已八九月中與侍  
中常侍武騎及待詔隴西北地良家子能騎射者期諸  
殿門故有期門之號自此始微行以夜漏下十刻廼與  
常稱平陽侯旦明入山下騎射鹿豕狐兔手格熊羆馳  
騫禾稼稻稊之地民皆號呼罵詈也

又曰宣帝神爵三年起樂遊苑三輔黃圖云在杜陵苑  
又曰元始元年罷安定呼池苑以為安民縣

又曰枚乘說吳王曰漢上林離宮積聚玩好園守禽獸不如長洲之苑游曲臺臨上路不如朝夕之池

又曰房太子既冠就宮為立博望苑以通賓客

范曄後漢書曰永初六年春正月庚申詔越雋置長利高望如昌三苑又令益州置萬歲苑犍為置漢平苑

又曰延熹二年初造昆陽苑置丞尉

又曰安帝永初元年以廣平遊獵地假與貧民廣成苑名在汝州

又曰靈帝光和三年作畢圭靈崐苑畢圭苑有二東畢圭周圍一千五百步中有魚梁臺西苑周三百三十步並在洛陽宣平門外

又曰靈帝光和五年始制園囿置以宦者為令

又曰楊賜為少府光祿勳代劉郃為司徒帝欲造畢圭靈崐之苑賜上疏諫曰竊聞使者並出規度城南人田欲以為苑昔先王造苑囿裁足以容修三驅之禮薪菜芻牧皆悉往焉先帝之制左補鴻池右作上林不奢不



約以合禮中今猥規郊城之地以為苑囿壞沃衍廢田園驅居人畚禽獸殆作非所謂若赤保子之義今城外

苑已有五六

陽嘉元年起西苑延熹三年造顯陽苑洛陽宮殿名有平樂苑上林苑桓帝延熹元

年置鴻德苑

可以遣情意順四時也宜惟夏禹卑宮太宗露

臺之義以慰下人之勞書奏帝意欲止以問侍中任芝

中常侍曹松等曰昔文王之囿百里人以為小齊宣七

十里人以為大今與百姓共之無害於政也帝悅遂令

築苑

漢官典職曰宮內苑聚土為山十里九坂種奇樹育麋鹿麇麕鳥獸百種激上河水銅龍吐水銅仙人銜盃受水下注天子乘輦遊獵苑中

漢舊儀曰上林苑中廣長三百里置令丞左右尉苑中養百獸天子遇秋冬獵射苑中取禽獸無數其中離宮七十所皆容千乘萬騎

又曰武帝時使上林苑中官奴婢及天下民貧貨不滿五十萬徙置苑中人五日五錢到帝得七十億萬以給

軍擊西域

續漢書獻帝紀曰昭寧元年董卓住兵屯陽苑使者就拜司空

續漢書百官志曰上林苑令一人六百石主苑中禽獸東觀漢記曰桓帝延熹元年初置鴻德苑

張璠漢記曰梁冀多饒苑囿西至弘農東至滎陽南入魯陽北到河淇

崔鴻十六國春秋後趙錄曰趙王八年春正月立桑梓

苑於襄國

後燕錄曰慕容熙築龍勝苑廣袤十餘里役二萬人又起景靈山苑內基廣五百步峰高十七丈又起逍遙宮甘露殿連房數百觀門相交鑿天河渠引入宮

晉宮閣名曰洛陽有洪德苑靈昆苑平樂苑

苑  
河南十二境簿曰河南縣有鹿子苑洛陽城西有桑梓

孟子曰齊宣王問孟子曰文王之囿方七十里有諸何

其大也孟子曰民猶以為小也王曰寡人之圃方四十里民以為大何也曰文王之圃芻蕘雉兔者往焉與民同之民以為小宜矣王之圃殺麋鹿者如殺人是以前十里為弇也民以為大不亦宜乎

呂氏春秋曰昔先王之為苑圃園池足觀望勞形而已矣非好侈節乎性也

陶季直京都記曰覆舟山周迴二十里有林名白水苑又曰建康縣北吳朝為桂林苑

南朝宮苑記曰樂游苑在覆舟山南北連山築臺觀苑內起正陽林光等殿

又曰桂林苑在落星山之陽吳都賦云數軍實于桂林之苑即此也

又曰芳林苑一名桃花園本齊高帝舊宅在廢東府城邊秦淮大路北齊王融作曲水詩序載懷平浦乃睠芳林即此也

又曰南苑在臺城南鳳臺山宋孝武以南苑地給張永

云曰給三百年期訖更啟即此也

渚宮故事云湘東王於子城中造湘東苑穿地構山長數百丈植蓮蒲緣岸雜以奇木其上有通波閣跨水為之南有芙蓉堂東有禊飲堂堂後有隱士亭北有正武堂堂前有射棚馬埕其西有鄉射堂堂安行棚可得移動東南有連理樹太清初生此連理當時以為湘東踐祚之瑞北有映月亭修竹堂臨水齋前有高山山有洞石潛行宛委二百餘步山上有陽雲樓極高峻遠近皆

見北有臨風亭明月樓顏之推云屢陪明月宴並將軍  
扈義熙所造

三輔黃圖曰二觀十四宮在甘泉苑垣內甘泉苑起仙  
人觀

石虎鄴中記曰鄴城西三里桑梓苑有宮臨漳水凡此  
諸宮皆夫人侍婢又並有苑囿養獐鹿雉兔虎數遊宴  
於其中

西京雜記曰廬陵王胥有勇力恒於別園學格熊羆後



遂能空手搏之

又曰樂遊苑自生玫瑰樹樹下多苜蓿

又曰文帝為太子立思賢苑以招賓客

又曰梁孝王好宮室苑囿之樂作耀華之宮築兔園園中有白室山山上膚寸石落猿巖棲龍岫又有雁池池間有鶴洲鳧渚宮館相連延亘數里奇果異樹瑰禽怪獸靡不畢備王與宮人賓客弋釣其中

韓子曰秦大飢應侯請發五苑果棗悉以活民王曰秦

法賞有功誅有罪今發五苑是有功無功俱賞也

禮稽命微曰外內之制各得其所四方之事無有畜滯則麟遊囿六畜繁多天苑有德星應

白虎通曰苑囿所以在東方何苑囿養萬物者也東方所以生也

戰國策曰張儀說韓王曰大王不助秦鴻臺之宮樂林之苑非韓之有也

拾遺記曰黃帝為養龍之囿

洞冥記曰北及玄坂去空同七十萬里日月不至其地  
自明有紫河萬里流沫千丈中有寒河霜下方香茂也  
北有潰陽之山有兔如鼠能飛毛色光如漆以腦和丹  
食則不死帝使放兔於昭祥苑苑在甘泉宮西周千里  
萬國獻異物皆集此中


三輔黃圖曰甘泉苑起仙人觀緣山谷行至雲陽三百  
八十里入右扶風周廻五百四十里

西京記曰東宮有九殿禁苑在宮城之北苑中有四面

監分掌宮中種植及修緝又置苑總監都統並屬司農寺

又曰東都苑隋曰會通苑又改為芳華

又曰神都苑周迴一百二十六里東面七十里南面三十九里西面五十里北面二十四里



太平御覽卷一百九十六